

2 Theilsaqlolni

Gevq-a nail gaq

Haoqgavq niil keiv iqmoeq ilmoeq bhai maqkhaiq, haoqnao naosaq bhai maqkhaiq, Gaqkhoel Paolluv aivq-i mail gevq-a nail ngaol dai, gevq-ai thaq nail ngaol. Al ovqtavq, milnee uqnee khe Khali yaq juq jemao iqsanl, Paolluv-i mail gevq-a nail ngaol dai, noeq nail ngaol.

Gevq-a nail aqyanq khi mail aqduq

Gevq-a nail aqyanq neq, A.D. 51-52 kovq bhai ngaol. Gevq-a nail aqduq neq, Gaolliqthu meenq ngaol. Paolluv 1 Theilsaqlolni haoqgavq gevq khi, Siqlav khi mail Tilmolsei q ayu nvq gaq-i mail Theilsaqlolni meenq bhai jaol nail Khali yaq munt bhai bhi bivq ail khi kovq lal-al nee ngal-aq, 2 Theilsaqlolni haoqgavq gevq-a nail ngaol.

Khaq sil gaq bhai gevq bhiq-a nail

Haoqgavq niil keiv neq, Theilsaqlolni meenq khe jaol nail Khali yaq munt bhai gevq bhiq-a nail ngaol. Theilsaqlolni meenq neq, ngaqkha daoljail bhai jiav khi jaiq gaiq jaiq kha kha nail al jaiq-ail mao nail meenq meenq ma teevq meenq ngaol. Tsaol-aq nvq sainv gaq niidai jaol nail ngaol. Theilsaqlolni Khali yaq munt neq, Paolluv-i mail daoqthaoq thaoq-a nail ngaol. A bhai khe Khali yaq jemao Yuldav tsaol-aq maq ngel dai, yuq nail jeq-e jaq-a ngaol.

Khul bhai noeqthunq khi gevq-a nail

Haoqgavq niil keiv neq, khoeq nail jiovgq nail phağ bhai ya dağ khi ngaol-aog, ivqdao dai jaol yaoq dai, gağ bivq nail haqbhoil gevq-a nail ngaol. Heeqphağ Yeiqsul nvq pov teevq pov yavq kha lee nail ganl bhai noeq bheeq-ai thağ nail juğ khalhai neema ya thağtsaol nail tsağ nail dai, cavq bhiq cov bhiq-a nail nee ovqtavq, Heeqphağ Yeiqsul nvq pov teevq pov yavq kha lee nail bhai daonq thailthaiq-u phao, aqdoevq khalhai ya doevq nail dai iqsanl, cavq bhiq cov bhiq-a nail ngaol.

Iqmoeq ilmoeq khe daoq

¹ Paolluv, Siqlav khi Tilmolseiq, nvjuq hail gağ, ngadao nail Aqbhu Miqyail khi Heeqphağ Yeiqsul Khali nail lavqkhoel bhai jaol nail, Theilsaqlolni meenq khe jaol nail Khali yağ munl bhai haoqgavq niil gevq bhoel-ai lavq-a nail ngaol.

² Ngadao nail Aqbhu Miqyail khi Heeqphağ Yeiqsul Khali nail geeqlaoq eeljaol khi neesal-ovq nail phağ nuljuq nail kovtavq bhai jiağ dei-eiq.

Yeiqsul yavq kha lee-u phao, yalkhağ dal nail ganl

³ Aqivq jaqbheq juğ-ol, nvjuq nuljuq nail haqbhoil khağ mao iqsanl, Miqyail bhai tsigeeq heeq phağ-ail tsağ nail ngaol. Khul khi mail dai ngal-ağ neq, nuljuq neema thağtsaol nail phağ eeq lal mao lal thailthaiq khi, nvjuq iqsanl teevq gağ nee teevq gağ goil nail gaiq-a nail phağ mao lal thailthaiq nail ngel-i mail, nvjuq alhai tsigeeq heeq phağ-ail tsağ nail ngaol. ⁴ Miqyail nail Khali yağ munl juğ nail sivtavq bhai nvjuq nuljuq bhai

tsiqeeq naol. Khul khi mail dai ngal-aq neq, nuljuq khoeq nail jiovq nail khi, haq dee aog deedee nail iqsanl bhai ya daq khi ngaol-aog, ol ol-ail neema thaqtsaol nail ngaol.

⁵ Nuljuq alheel nail neema aol nail ngel-i mail, Miqyail tsaq nail daol nail lavqkhoel nee yalkhaq dal nail bhai bhaqlaog kheq dai, bhi dov lal-a nail ngaol. Khul khi mail dai ngal-aq neq, nuljuq aivq nail Milkhaoq bhai geel-nvq lal dai, aivq nl thailthaiq nail ngaol. Milkhaoq al nail haqbhoil nuljuq daq thailthaiq nail ngaol. ⁶ Miqyail neq, tsaq nail daol nail lavqkhoel nee yalkhaq dal nail gaq pevq nail ngaol. Alheel ngel-i mail, nuljuq bhai khoeq lavq jiovq lavq nail tsaol-aq juq bhai khoeq nail jiovq nail phaog bhi kev lee nail ngaol.

⁷ Heeqphaq Yeiqsul nqtavq nee mail, bhaqaoq teevq bhee aol nail aivq nail nqtavq gaqkhoel nee mail teevq gaq khe-ai, miqjaq nail aqbhaq lavqkhoel nee dov lee-u phao, khoeq nail jiovq nail bhai ya daq-a nail nuljuq bhai nvjuq nee mail teevq gaq khe-ai gaqnaq bhi naq lavq nail ngaol. ⁸ Aq-u phao, Miqyail bhai maqkhaiq, ngadao nail Heeqphaq Yeiqsul nail lavqkhiq tsail nail geeqlaog daoq bhai maq naldaiq nail tsaol-aq bhai maqkhaiq, aivq mailma-ail nl kovq bhiq nail ngaol. ⁹ Yeiqsul yavq kha lee-u n-gaol, tsaol-aq al juq neq, aivq bhai maqkhaiq, seiqlaiq khaoqsail teevq bheeq aol nail aivq nail bhaqaoq bhai maqkhaiq, ya pav-ail khi, nqmaq maqluv halyeel luq-ail seil-ail nail bhai ya daq nail ngaol. ¹⁰ Aq-u n-gaol Yeiqsul neq, aivq nail tsaol-aq bhaqda nee seiqlaiq khaoqsail ya nail nee ovqtavq, aivq

bhai neema thaqtsaol nail tsaol-aq iqsanl mail noeq-u maq dov-ail tsiqeeq nia dai, yavq kha lee nail ngaol. Nvjuq salkhil khanq nail bhai nuljuq neema thaqtsaol nail ngel-i mail, nuljuq iqsanl munl al munl nail lavqkhoel bhai aol nail ngaol.

¹¹ Alheel ngel-i mail, nvjuq khaq mao iqsanl nuljuq nail haqbhoil geeqlaoq niailhai hal nail ngaol. Ngadao nail Miqyail-i mail khul-a nail bhai geel-nvq lal dai, aivq nl lavq dai maqkhaiq, aqmeeq pha q nl movq nail neema iqsanl khi neema thaqtsaol nail ngel-i mail khal nl khal hal nail iqsanl, aivq nail bhaqaoq bhaqda nee aivq nl gil nia dai maqkhaiq, nvjuq geeqlaoq hal nail ngaol. ¹² Alhai bhee lal haq neq, nuljuq bhaqda nee ngadao nail Heeqphaq Yeiqsul nail aqmil seiqleiq khaqsail ya khi, aivq bhaqda nee nuljuq seiqleiq khaqsail ya nail ngaol. Ngadao nail Miqyail khi Heeqphaq Yeiqsul Khali nail geeqlaoq eeljaol bhaqda nee, alhai pevq lal nail ngaol.

2

Oeqbal nail aqheel gaq dov lal nail ganl

¹ Aqivq jaqbheq juq-ol, ngadao nail Heeqphaq Yeiqsul Khali yavq kha lee nail ganl bhai maqkhaiq, ngadao aivq jaol nail bha ya jil lai nail ganl bhai maqkhaiq, nvjuq nuljuq bhai niailhai hal nail ngaol. ² “Heeqphaq Yeiqsul nail aqn kev lee-aog naol” dai, aqhaqlal lavqkhoel nee maqkhaiq, daoq ge daiq lavq nail lavqkhoel nee maqkhaiq, nvjuq nail haoqgavq khe-ai, gevq lavq nail lavqkhoel nee maqkhaiq, yu nuljuq bhai ge

lal khi ngaol-aoq, niil juq bhaqda nee, nuljuq nail neema lavqtsail mail thaq suqsaq thaq geesil. ³ Tsaol-aq teevq gaq gail nuljuq bhai khul pha q nail ganl nee maqkhaiq, jalmul maq ya mul ya dai, yaolphaol yaoq. Khul khi mail dai ngal-aq neq, aqn al n maq kev lee-u nee mail, miltsaq kovtavq bhai Miqyail nail daoq maq naldaiq nail nee ovqtavq aivq bhai genl dev nail pha q pevq lal nail ngaol. Aq-u phao, haqev deede nee mail ga q dov lal nail ngaol. Thailhai ngaol-aoq, haoqnao naosaq n-gaol, aivq neq, ya luq ya seil-ail nail ngaol. ⁴ Tsaol-aq al ga q Miqyail bhai maqkhaiq, Miqyail dai, yu khal khul nail juq bhai maqkhaiq, uqhuq tha oq nail yaoq pha q yaoq-ao nee bhai maqkhaiq, genl dev khi, al juq nee maqtsil aivq nail aqmaol bhai aivq tha qeeq nail ngaol. Aivq Miqyail nail uqhuq tha oq nail ilkhaol il ma nail lavqkhoel bhai jaoldeel khi, "Ngal neq Miqyail ngaol" dai, mailma-ail ge nail ngaol.

⁵ Ngal nuljuq nee mail jaol-u phao, ganl niil juq nuljuq bhai ge daiq bhiq-a nail bhai, nuljuq nioilpeivq ail-aoq nail lai q. ⁶ Niil aq-il nee mail haqev deede nee mail al ga q ma q dov lal nail neq, ganl teevq pha q jiav nail bha qda nee mail ngaol. Ganl al pha q bhai nuljuq heeq nia nail ngaol. Aqyanq tsa q lal-u phao, alhai pevq lal nail ngaol.

⁷ Miqyail nail daoq bhai ma q naldaiq nail pha q neq, niil aq-il iqsanl aqnav nail lavqkhoel bhai ganl nl thailthai q nail ngaol. Thailhai ngaol-aoq, daoq ma q naldaiq nail al pha q bhai ma q bhi dov lal dai, lav tsoiq nail ga q jaol nail ngaol. Lav tsoiq nail ga q dov ail ha q neq, ganl al juq pevq lal nail ngaol. ⁸ Aq-u phao, haqev deede

nail al gaq bhaqlaoq kheq dai dov lal nail ngaol. Thailhai ngaol-aog, Heeqphaq Yeiqsul tsaol-aq al gaq bhai aivq nail aqhaq-i mail jiv heivq nail ngaol. Aivq nail seiqleiq khaoqsail lavqkhoel nee yavq kha lee nail ngel-i mail, tsaol-aq al gaq luq-ail seil-ail nail ngaol. ⁹ Haqev nail tsaol-aq al gaq, neivq Saqdaq bhaqda nee dov lal-a nail ngaol. Aivq dov lal-u phao, yu bhai goiqbhaoq bhaoq ya nia dai, neivq Saqdaq nail bhaqaoq yuq nail lavqkhoel nee bhi heeq bhiq moel nail juq khi noeq-u maq dov nail pha q nl nail ngaol. ¹⁰ Luq-ail seil-ail thailthaiq nail tsaol-aq juq bhai goiqbhaoq bhaoq khi jalmul mul ya nia dai, aivq haqev nail yaoq pha q yaoq-ao nee bhai juq khi nl nail ngaol. Luq-ail seil-ail thailthaiq nail tsaol-aq, hevqkovq nail pha q bhai ya dai, maldil tsaq nail pha q bhai gaiq-a nail neema maq aol nail ngel-i mail, luq-ail seil-ail nail ngaol. ¹¹⁻¹² Alheel ngel-i mail, haqev nail pha q bhai lavqkhiq tsail khi, maldil tsaq nail pha q bhai neema maq thaqtsaol nail tsaol-aq iqsanl bhai yalkhaq dal dai, maq ngel nail pha q bhai neema bhi thaqtsaol dai, noeq bheeq noeq leel nail pha q Miqyail aqyu juq bhai bhi kev bhi thel lee-a nail ngaol.

Hevqkovq nail pha q ya dai Miqyail nuljuq bhai tsel dov-ai tha q nail ganl

¹³ Heeqphaq Yeiqsul mao-ail gaiq-a nail aqivq jaqbheq juq-ol, nuljuq nail haqbhoil kha q mao iqsanl Miqyail bhai tsiqeeq nail tsaq nail ngaol. Khul khi mail dai ngal-aq neq, Aqhaqlal Miqyail nuljuq bhai bhi haol lal nail nee ovqtavq, nuljuq

maldil tsaq nail phaḡ bhai neema thaḡtsaol-a nail bhaḡda nee, hevḡkovḡ nail phaḡ ya dai, iqmoeq-u phaḡ nee Miḡyail nuljuḡ bhai tsel dov-ai thaḡ nail ngaol. ¹⁴ Alhai pevḡ lal dai, Miḡyail nvjuḡ-i mail cavḡ-a nail lavḡkhiḡ tsail nail geeḡlaoḡ daoḡ bhai juḡ khi nuljuḡ bhai khul-a nail ngaol. Nuljuḡ ngadao nail Heeqphaḡ Yeiqsul Khali nail seiḡleiḡ khaḡqsail bhai ya dai, aivḡ alhai khul-a nail ngaol. ¹⁵ Alheel ngel-i mail, aḡivḡ jaḡbheḡ juḡ-ol, ivḡdao dai doevḡ yaoḡ. Nvjuḡ-i mail nuljuḡ bhai moeqthaoḡ-i mail cavḡ bhiḡ-a nail juḡ bhai maḡkhaiḡ, haoḡgavḡ gevḡ khi cavḡ bhiḡ-a nail juḡ bhai maḡkhaiḡ, alhai cavḡ bhiḡ cov bhiḡ-a nail iqsanl bhai ivḡdao dai, nieivḡ thaiḡ-ai thaḡ yaoḡ.

¹⁶ Ngadao nail Heeqphaḡ Yeiqsul Khali khi mail ngadao nail Aḡbhu Miḡyail ngadao bhai ḡaiḡ-a khi aivḡ nail geeḡlaoḡ eeljaol bhaḡda nee nḡmaq maḡluv halyeel neesal ya nail phaḡ maḡkhaiḡ, ivḡdao dai noeqthunḡ nail phaḡ maḡkhaiḡ, ngadao bhai bivḡ lavḡ-a nail ngaol. ¹⁷ Heeqphaḡ Yeiqsul Khali khi ngadao nail Aḡbhu Miḡyail neḡ, nuljuḡ khaḡ mao iqsanl, aḡmeeḡ phaḡ nl nia nail nee ovḡtavḡ, daoḡ aḡmeeḡ phaḡ ḡe nia dai, ḡaḡ bivḡ khi bhi ivḡ lal dei-eiḡ.

3

Geeḡlaoḡ hal tsaḡ nail ḡanl

¹ Aḡivḡ jaḡbheḡ juḡ-ol, haoḡnao naosaḡ khe daoḡ neḡ, niailhai ngaol. Miḡyail nail daoḡ nuljuḡ nail lavḡkhoel bhai lavḡtsail mail ḡaiḡ doi-ail khi seiḡleiḡ khaḡqsail ya-a nail khe-ai,

yaoq dao yaoq bhai iqsanl alhai pevq lal dai, nvjuq nail haq̄bhoil geeqlaoq hal yaoq. ² Maq meeq maq jaq nail tsaol-aq khi haq̄eiv nail tsaol-aq juq nail aqlavq lavqkhoel nvjuq ya jel-ail dai iqsanl, geeqlaoq hal yaoq. Khul khi mail dai ngal-aq neq, tsaol-aq iqsanl mail Yeiqsul bhai neema thaqt̄saol nail maq ngel-ail. ³ Thailhai ngaol-aq, Yeiqsul neq saljial ivq nail ngaol. Aivq nuljuq bhai bhi ivq lal khi nuljuq neivq Saqdaq nee ya jel-ail dai, aivq heldaiq phail lavq nail ngaol. ⁴ Nvjuq-i mail daoq bivq-a nail khe-ai nuljuq nl nail nee ovqtavq, iq̄moeq phao lai-u iqsanl nl nail ngaol dai, Yeiqsul bhaqda nee nvjuq neema thaqt̄saol naol. ⁵ Miqyail nail goil nail gaiq-a nail pha q̄ bhai nuljuq heeq nia jaiq lal dai maq̄khaiq, Khali khe-ai daq tsaol oltsaol dai maq̄khaiq, Yeiqsul nuljuq nail neema bhai lav sav bhiq dei-eiq.

Yaoq gaq yaoq-ao nee ganl ya nl nail ganl

⁶ Aqivq jaq̄bheq juq-ol, ngadao nail Heeqphaq Yeiqsul Khali nail aqmil kov-uvq nee, nvjuq nuljuq bhai daoq niailhai bivq nail ngaol. Nvjuq-i mail nuljuq bhai cavq bhiq cov bhiq-a nail bhai maq tsaothe mail, khul teevq pha q̄ iqsanl maq nl maq hal nul nail aqivq jaq̄bheq Khali ya juq bhai aqt̄saol tha q̄ tsaol. ⁷ Nvjuq-i mail nl-a hal-a nail juq bhai nuljuq saol oil heeq pha q̄-ail tsa q̄ nail ngaol dai, nuljuq heeq nia nail ngaol. Nvjuq nuljuq nee mail jaol-u phao, ganl maq nl dai aq̄nieivq-ail jaol-a nail maq ngel-ail. ⁸ Nvjuq aq̄phoiq maq bivq-ail nuljuq nail teevq pha q̄ iqsanl maq jaq̄-al. Nuljuq teevq ga q̄ bhai iqsanl

maq ya dal dai, nvjuq nqkiv n-gaol maqkhaiq, ganl nl deedee-a nail ngaol. ⁹ Yu-i mail bhi jaq lavq nail bhai nvjuq jaq kivq dai, aqkhaooqanq maq jiav nail ngel-i mail, maq jaq-a nail maq ngel. Nuljuq nvjuq bhai saol oil khi tsaothe nia dai, alhai nl-a nail ngaol. ¹⁰ Nvjuq nuljuq nee mail jaol-u phao, nuljuq bhai daoq niailhai bivq-a nail ngaol. “Ganl maq nl nul nail tsaol-aq, aoq thaq jaq” dai, ge-ai thaq nail ngaol.

¹¹ Nuljuq nail lavqkhoel khe tsaol-aq teevq pav ganav juq khul teevq pha qqsanl maq nl maq hal nul nail nee ovqtavq, yovqgavq nail ganl bhai neq, teevq peivq-ail maq nl dai, yu nail ganl bhai taivq-ail lav tsoiq lav lev nail ngaol geiq dai, nvjuq ya gaiq-a nail ngaol. ¹² Nvjuq alheel nail tsaol-aq bhai Heeqphaq Yeiqsul Khali nail aqmil kov-uvq nee daoq niailhai bivq khi, gaq niailhai bivq nail ngaol. Ivqdao dai doevq khi, yovqgavq ya jaq ya daol dai, nl yaoq hal yaoq. ¹³ Aqivq jaqbheq juq-ol, aqmeeq pha q nl nail bhai, gaq thaq bhaq.

¹⁴ Tsaol-aq teevq gaq ganav, nvjuq-i mail gevq-a nail daoq bhai maq naldaiq haq neq, aivq bhai noeq thaq-ai yaoq. Aivq ya haqsil dai, aivq bhai aqtsaoq thaq gaoq tsaq. ¹⁵ Thailhai ngaol-aq, ngadao bhai neejiav jiav lal nail gaq bhai noeq thaq-a nail khe-ai aivq bhai thaq noeq thaq. Aqivq jaqbheq khe-ai saol-nvq khi, aqmeeq-ai cavq bhiq cov bhiq yaoq.

Haoqnao naoq saq khe geeqlaoq bivq-a nail daoq

¹⁶ Neesal bhi ovq nail Heeqphaq, nuljuq bhai yaoq pha q yaoq-ao nee nail lavqkhoel khaq mao iqsanl neesal bhi ovq dei-eiq. Heeqphaq Yeiqsul nuljuq iqsanl nee mail jaol dei-eiq.

¹⁷ Ngal neq, Paolluv ngaol. Nuljuq bhai noeq moel naol dai, ngaq nail aqlavq-i mail gevq bhoel-ai lavq-a nail ngaol. Ngaq-i mail khal gevq-a nail haoqgavq yaoq keiv yaoq-ao nee bhai nuljuq heeq nia dai, niailhai gevq-ai tha q nail ngaol. Ngaq-i mail gevq-a nail haoqgavq neq, niailhai ngaol.

¹⁸ Ngadao nail Heeqphaq Yeiqsul Khali nail geeqlaoq eeljaol nuljuq iqsanl nail kovtavq bhai jiav dei-eiq.

Jalliq aqsivq Gaolkheel daoq
Akeu: Jalliq aqsivq Gaolkheel daoq New Testament
copyright © 2015 Wycliffe Bible Translators, Inc.

Language: Gaolkheel (Akeu)

Contributor: Wycliffe Bible Translators, Inc.

All rights reserved.

2020-11-13

PDF generated using Haiola and XeLaTeX on 21 Feb 2024 from source
files dated 29 Jan 2022
aaaba9fd-8172-55cc-ad15-906f43ddb5a5